

Leeter masa  
Janj  
ma wuzlala nga dey cew  
Mey da ray  
Leeter masa Janj ma wuzlala nga dey  
cew

Leeter nga Janj nga dey cew e keɗe na, ara ngada Dam-mamaha ta bəz anja hay. Anda meləvey, ngada ndəhay daa mecəmey-ray nga Yesu (aya 1). Mey daa leeter e keɗe na, anja gweegwe anda leeter masa ngeeme. A ləvtar da ya wudkwa Bay Gazlavay fara fara na, ya wudkwa vaw da wuzlah aləkwa la may (aya 4 haa 6). Asaya, a ləvtar nga wam vaw fa ray ata amba aa zəɗdamara mawurbay nga sləra ata ba (aya 7 haa 11). Janj a vəltar gəɗan amba a pamara Yesu nga ndaw ata fara fara mandaw mandaw. A ndəvda leeter anja ha, a ləvtar a sawa la fa ata amba a kam maɗay dey ta dey. A kadatara ndəhay daa Egəliz mekele ma camatar har (aya 12 haa 13).

*Mecey-har*

<sup>1</sup> Ara yah, ndaw-maraw \* da wuzlah bay-ray hay nga ndəhay nga Yesu ma wuzlala ɗerewel keɗe.

Ya wuzlalakawa ngada kah, Dam-mama aɗaw † masa Gazlavay ma wala leŋ ngada bəz akah hay, akwar masa yah ma wudkwar fara fara. Ara yah taava aɗaw ma

---

\* 1:1 1.1 ndaw-maraw: Ndəhay a wulkam «ndaw-maraw» na, ara Janj. † 1:1 1.1 Dam-mama aɗaw: Har-gəɗan nga ndəhay a wulkam «dam-mama aɗaw» a wudɗey nga ləvey Egəliz. Anda keɗe, «bəz akah hay» ara ndəhay daa Egəliz e.

wudŋkwar daada ba, ama ndəhay tabiya ma sərmara mey ŋga Gazlavay masa fara fara, a wudŋmakwar may. Ya wudŋmakwar na, <sup>2</sup> maja mey fara fara ha aa daa mevel aləkwa. A da njeɣ ta aləkwa ŋga sərmataw.

<sup>3</sup> Anja \*Gazlavay, Papa aləkwa, ta \*Yesu \*Kəriste, Bəzey ŋga Papa aləkwa ha, ŋga pəsmindakwar mey, ŋga sərfamandakwar dey-ceceh, ŋga njadamandakwar daa zazay, aləkwa masa ma təbkwə mey masa fara fara, asaya, aləkwa masa ma wudŋkwa vaw da wuzlah aləkwa.

*Mey da ray mewudɣey-vaw fara fara*

<sup>4</sup> Ya faa səmey ga maja ya nəkə na, bəz akah hay siya fa səpmara mey masa fara fara anda Papa aləkwa ma ləvndakwar. <sup>5</sup> Yaw, Dam-mama aɗaw, ehe wure keɗe, ya fa kaka ambahw, ya ləvka, wudŋkwa vaw da wuzlah aləkwa. Ya wuzlalaka keɗe na, ara \*mewey mawiya ba, ama ara mewey masa aləkwa ma sərkwa dəga aləkwa ma təbkwə mey ŋga Yesu təlām. <sup>6</sup> Gazlavay a ləvkwar, wudŋam vaw da wuzlah akwar. Keɗe ara mewey masa akwar ma cəndamara dəga akwar ma təbmarə mey ŋga Yesu təlām.

*Mey da ray masa-gəra hay ŋga Kəriste*

<sup>7</sup> Ndəhay ma mbərzlam hay ga daa wura daa wura da bələ keɗe daha. Yesu \*Kəriste ta tərey sem ŋga ndaw-magədaɗ na, ndəhay ma mbərzlam hay a ŋgene a təbmarə mey a ba. Ndəhay ma təbmarə ba ha na, ara ndəhay ma mbərzlam, ata masa-gəra hay ŋga Kəriste. <sup>8</sup> Maja ŋgene, wam vaw fa ray akwar, amba kaa zəɗdamara mawurbay ŋga sləra akwar ba. Anda keɗe, cek hay tabiya masa Gazlavay ma ɗiya maja akwar na, ka hətām la.

<sup>9</sup> Sərmara, mey masa Kəriste maa sərkadandakwara na, kwa waawa ma səpa mey a ta cəved e ba, a pey mey mekele a dey a na, ndaw a macəmkaya ta Gazlavay daa ba. Ama ndaw ma səpa mey masa Kəriste maa sərkadandakwara na, ndaw a macəmkaya ta Gazlavay, Papa aləkwa, lej ta Bəzey aŋga. <sup>10</sup> Ara maja ŋgene, ya fa ləvkwar, da ndaw a sawa fa akwar, a wuzkwar mey mekele wal da ray Kəriste na, ka da təbmara ndaw a, a way akwar ba, kwa ka da camar har ba. <sup>11</sup> Sləra maaya ba masa ndaw a ma ka na, ndaw ma car har na, anda a kamara cew e.

*Mey ŋga madagway-dakw*

<sup>12</sup> Yaw, ya wudəy ŋgaa guzlkwar da ray cek hay ga, ama ya wudəy ŋga wuzlalakwara fa dferewel ba. Ya wulkey ŋga daw fa akwar, yah ta ray adaw, ya da njakwa cew e, ya kakwa maɗay, amba ya njakwa daa meesəmey masa fara fara.

<sup>13</sup> Bəza hay ŋga Dam-mamakw † masa Gazlavay ma wala a camaka har.

---

1:9 9 1Jh 2.23 1:10 10Rm 16.17 1:12 12 3Jh 13-14 † 1:13 1.13 Bəza hay ŋga Dam-mamakw: Fedə a wudəy ŋga ləvey ndəhay daa Egəliz ŋga ata Jan.

Mejəwey-mey Mawiya  
Mofu-Gudur: Mejəwey-mey Mawiya New Testament  
Le Nouveau Testament en langue Mofu-Gudur (Cameroun)

copyright © 2007 Wycliffe Bible Translators, Inc.

Language: (Mofu-Gudur)

Contributor: Aramaic Bible Translation, Inc.

All rights reserved.

2020-11-19

---

PDF generated using Haiola and XeLaTeX on 14 Jun 2022 from source files dated 24 Nov  
2021

2b021919-36cf-59da-a35f-10c5e5548811